



Sabtu, 7 Desember 2024
Ogen: Maleaki 4: 1-3



Italuken Me Kalak Si Jahat



Wari Tuhan e me wari si enggo itentukan Tuhan nehken sura-suraNa man isi doni enda. Wari si itentukanNa ngelakoken perkara-perkara si mbelin. Perkara e salah sadana e me ngukum kalak si meganjang rukur ras kalak jahat. I bas wari e pagi meseng me ia kerina, sitik pe lanai lit tading. Bali ras nggala si iciluk i bas api. Gurlah me ia dungna tading abu. Ikabangken angin lesap me ia, kai pe lanai lit tading. Bage me kecibal kalak si jahat ras si meganjang rukur, lesap rasa lalap. Tapi kalak si ngikutken Tuhan ikeliniNa, ipulahiNa i bas iketen kalak jahat nari. Ibereken Tuhan kuasa man bana naluken kalak jahat. Iperjaki kalak bujur me kalak jahat e desken abu itapak-tapak nahena. Teridah tuhu, Tuhan e adil ras bujur man kalak jahat ras man si ngikutken kataNa. Upah e sue ras kai si ilakokenna.

Si jadi pelajaran man banta, tupung lit denga waktu, ope denga seh wari Tuhan e, tadingken biak ras perbahanen si jahat i bas dirinta. Biak percian, merawa, jungut-jungut, perberjut, merampus, perkisat, meganjang rukur ras sidebanna. Bage pe perbahanen si jahat, nangko, erbual, ndarami kesalahen kalak, mpembarken berita guak, cikurak, mpekitik teman, nembah man berhala, malas eribadah, munuh karakter kalak ras sidebanna. Paksa enda masa pertobatannta. Si siksiki pusuh ras perbahanennta, apai si perlu itadingken entah iperobahi. Ikutken Kata Tuhan e. Sidahi Ia ku Rumah Pertoton, si begiken kataNa, sisehken kekelengen man isi jabu ras teman sekelewetta. Silakoken e erkiteken kita enggo leben ikelengi Tuhan. Mari dage ula si pedekah-dekah. Dahilah Tuhan, lakoken si bujur.